


Centralna banka Bosne i Hercegovine

Odjeljenje za statistiku i publikacije

Informacija o rezultatima ankete o inflatornim očekivanjima iz juna 2022. godine

Upravljanje i stabilizacija inflatornih očekivanja bitno utiče na cjenovnu stabilnost i odraz je povjerenja u mjere monetarne politike, kredibilnost i efikasnost monetarne vlasti. S tim u vezi, CBBiH, kao važan segment komunikacijske strategije, od marta 2019. godine redovno, polugodišnje provodi Anketu o inflatornim očekivanjima, sa ciljem analize i kontinuiranog praćenja inflatornih očekivanja ekonomskih subjekata. Učesnici ankete su predstavnici finansijskog sektora, komercijalne banke i osiguravajuća društva. Aktuelno ubrzanje inflacije te interes domaćih i stranih institucija dodatno skreće pažnju na rezultate navedenog istraživanja te se od 2022. godine anketa sprovodi na kvartalnoj osnovi.

Rezultati ankete sprovedene u junu 2022. godine ukazuju na uočljiv porast kratkoročnih inflatornih očekivanja za tekuću godinu. Očekivana inflacija za tekuću godinu iznosi 10,8% i porasla je u odnosu na nivo od 7,1%, koji je zabilježen u anketi sprovedenoj u martu tekuće godine. Ubrzani rast inflatornih očekivanja za 2022. godinu, u odnosu na prognoze iz prethodne godine, kada su očekivanja bila na nivou oko 2% govori da su finansijske institucije prilično iznenađene sa ovolikim inflatornim pritiscima, a što je u dobroj mjeri u direktnoj vezi sa naglim poremećajima u vezi sa ratom u Ukrajini, a koji nisu bili u cjelini percipirani prilikom prošlih rundi anketiranja. Pritisci vezani za rast cijena energenata, hrane i drugih roba, usluge transporta, prekide u globalnim lancima snabdijevanja i neizvjesna politička dešavanja ne jenjavaju, a usljed sinhronizacije poslovnih ciklusa na globalnom nivou eksterni šokovi dominiraju. S tim u vezi rezultati ankete dalje upućuju da se ne očekuje skoro okončanje povišene inflacije, jer i očekivana stopa inflacije za 2023. godinu ubrzano raste i iznosi 8,6%, u odnosu na nivo od 4,8%, zabilježen u martu tekuće godine. Navedeni podatak potvrđuje negativne rizike i izazove vezane za projekciju daljih inflatornih kretanja te efekat koji mogu imati na kretanja pojedinih komponenti agregatne tražnje, u prvom redu potrošnje.



Izvor: Anketa o inflacijskim očekivanjima, juni 2022.